

AUGLÝSING

(III) um staðfestingu reglna sveitarfélaga um úthlutun byggðakvóta.

1. gr.

Með vísan til 3. mgr. 6. gr. reglugerðar nr. 722, 4. ágúst 2005, um úthlutun byggðakvóta fiskveiðiárið 2005/2006, staðfestir ráðuneytið eftirfarandi úthlutunarreglur þessara sveitarfélaga:

1. Hólmavíkurhreppur.

Úthluta skal til báta/skipa sem heimahöfn eiga á Hólmavík, landa aflanum í sinni heimabyggð og eigendur skráðir með búsetu í Hólmavíkurhreppi og eru enn skráðir þar þegar auglýstur umsóknarfrestur rennur út og hafi haft atvinnu af fiskveiðum sl. fiskveiðiár. Ekki koma til greina þær útgerðir sem leigt eða selt hafa kvóta frá sér á síðasta fiskveiðiári eða landað hafa utan heimahafnar nema gildar ástæður liggi fyrir s.s. sjóskaði eða stórkostleg vélarbilun. Úthlutunin skal vera jöfn milli allra þeirra sem úthlutun fá.

2. Höfðahreppur.

1. Úthlutuðum veiðiheimildum verði skipt eingöngu milli þeirra útgerðaraðila sem áttu lögheimili á Skagaströnd 1. desember 2004 og eiga skip með veiðileyfi, skráð 1. september 2005. Jafnframt er gert að skilyrði að 2/3 hlutar áhafnar skips sem sótt er um fyrir eigi lögheimili á Skagaströnd.
2. Miðað skal við að stærð fiskiskipa sem hljóta úthlutun sé takmörkuð við 250 brl.
3. Einungis verði úthlutað til þeirra sem leggja fram undirritaðan samning við samþykktu vinnslustöð á Skagaströnd um úrvinnslu aflans samkvæmt úthlutuðum heimildum. Í samningnum skal tiltekið hvers konar úrvinnslu um er að ræða svo og yfirlýsing um að samkomulag sé um fiskverð.
Með vinnslustöð er átt við að umrædd fiskvinnsla taki við fiskinum vinni hann á staðnum og breyti önnu hráefni í vöru. Slæging á fiski eða einhvers konar framhaldsvinna á fiskafurðum sem hafa verið meðhöndlaðar annarsstaðar er ekki viðurkennt sem vinnslustöð til samninga um móttöku á byggðakvóta. Vinnslustöð skal og hafa rekjanlega ferla þar sem hægt er að sýna fram á að fiskur frá ákveðnum aðila hafi komið til vinnslu á ákveðnum tíma.
 - a) Viðkomandi útgerð skal skuldbinda sig til að leggja eitt tonn á móti hverjum tveimur sem úthlutað er af byggðakvóta til vinnslu á Skagaströnd. Við mat á hæfi umsækjanda skal tekið tillit til þess hvort viðkomandi hafi kvótastöðu til að uppfylla það skilyrði. Séu veiðiheimildir umsækjanda ekki nægar er heimilt að skerða úthlutun sem því nemur.
 - b) Við gerð samkomulags um löndun afla vegna byggðakvótans skal við það miðað að honum hafi verið landað samkvæmt samkomulaginu fyrir 1. desember 2006. Jafnframt skal viðkomandi útgerð sýna fram á með óyggjandi hætti að staðið hafi verið við samkomulag um löndun byggðakvóta síðasta fiskveiðiárs ef slíkt samkomulag hefur verið gert. Hafi ekki verið staðið við löndun afla samkvæmt samkomulagi um byggðakvóta síðasta fiskveiðiárs verður úthlutun skert sem því nemur. Komi til skerðingar skv. a) og b) skal þeim hluta kvótans úthlutað skv. 5. tl. reglna þessara.

4. Við úthlutun veiðiheimildanna verði miðað við tvo flokka. Annars vegar þá sem hafa tapað veiðiheimildum vegna samdráttar í rækjuveiðum og hins vegar almenn úthlutun til útgerða báta með aflamark.
 - a) Byggðakvóti til báta með leyfi til veiða á innfjarðarrækju í Húnaflóa. Kvóta sem nemur 100 þorskígildislestum verður úthlutað til þeirra sem hafa yfir að ráða heimildum til innfjarðarrækjuveiða enda uppfylli þeir skilyrði 1.-3. tl. reglna þessara. Skal kvótanum skipt hlutfallslega eftir veiðiheimildum til innfjarðarrækjuveiða á Húnaflóa eins og þær voru 1999-2000. Umræddum kvóta verði skipt milli þeirra útgerða sem stunduðu innfjarðarrækjuveiðar á tímabilinu og enn gera út frá Skagaströnd.
 - b) Byggðakvóti til báta með aflamark. Kvóta sem nemur 40 þorskígildislestum verður úthlutað til báta sem uppfylla skilyrði 1.-3. tl. reglna þessara og skal skipta framan- greindum heimildum jafnt á milli hæfra umsækjenda.
5. Fyrir 15. júlí 2006 skulu útgerðir þeirra báta sem fengið hafa byggðakvóta gera sveitarstjórn skriflega grein fyrir því hvernig þeir muni nýta úthlutaðar aflaheimildir fyrir lok fiskveiðiárs. Geti hlutaðeigandi fyrirsjáanlega ekki fylgt reglum sveitarstjórnar skal hann afsala sér byggðakvótanum. Skal þeim kvóta endurúthlutað 1. ágúst, í þeim flokki sem kvóta var úthlutað í. Skal kvótanum úthlutað jafnt milli þeirra sem þegar hafa uppfyllt skilyrði um veiðar og vinnslu byggðakvótans.
6. Sækja skal um aflaheimildir samkvæmt reglum þessum til hreppsnefndar Höfðahrepps. Með undirritun umsóknar samþykkja viðkomandi aðilar þá skilmála sem reglurnar fela í sér.

3. Seyðisfjarðarkaupstaður.

1. Útgerðaraðilar með lögheimili og skráða báta á Seyðisfirði þann 1. september 2005 geta sótt um aflaheimildir fyrir fiskveiðiárið 2005/2006.
2. Úthlutuðum afla skal landa á Seyðisfirði til vinnslu á staðnum og skal viðkomandi útgerðaraðili auk þess leggja til viðbótar a.m.k. jafnmikinn afla til vinnslu á staðnum og hann fær úthlutað.
3. Við úthlutun skal verja 1/3 jafnt milli þeirra aðila sem uppfylla almenn skilyrði fyrir úthlutun og 2/3 hlutum skal úthluta í hlutfalli við kvótastöðu þann 1. september 2005.
4. Við úthlutun verður tekið mið af þegar úthlutuðum aflaheimildum á vegum Byggðastofnunar.
5. Hafí umsækjandi ekki veitt heildar aflaheimildir viðkomandi skips á síðasta fiskveiðiári skal úthlutun til hans skerðast sem því nemur að teknu tilliti til leyfilegs tilflutnings milli ára.
6. Hafí umsækjandi fengið byggðakvóta á fiskveiðiárinu 2004/2005 en ekki landað tvöföldu því magni til vinnslu á Seyðisfirði á því ári, þá fellur réttur hans til úthlutunar niður á fiskveiðiárinu 2005/2006.

4. Þórshafnarhreppur.

Umsóknarfrestur er til 20. janúar 2006 og skal skila umsóknum skriflega á skrifstofu Þórshafnarhrepps.

1. Byggðakvóta skal úthluta í tvennu lagi. Annars vegar til nýrra útgerða, allt að 5 þorskígildistonn á hvern bát og hins vegar til þeirra báta sem gerðir eru út frá Þórshöfn, landað hafa afla þar og hafa veitt allan sinn kvóta á liðnu fiskveiðiári. Þá skal og áhöfn báts vera með lögheimili á Þórshöfn. Sé sótt um undanþágu frá skilyrði um lögheimili skal hún vel rökstudd í umsókn.

2. Skilyrði er að viðkomandi útgerð flytji ekki af viðkomandi báti/bátum aflamark nema sem skipti á aflamarki. Útgerð skal fyrst landa eigin aflaheimildum áður en byggðakvóti verður færður á bát/báta viðkomandi. Þær útgerðir sem gera út fleiri en einn bát skulu hafa veitt samanlagðar aflaheimildir allra báta sinna áður en til úthlutunar byggðakvóta kemur. Við úthlutun byggðakvóta koma aðeins þær útgerðir til greina þar sem um aðalatvinnu útgerðaraðila og áhafnar er að ræða.
3. Að frádregnum úthlutunum vegna nýrrar útgerða skiptist byggðakvóti Þórshafnarhrepps milli einstakra báta þannig að 70% miðast við stærð báta en 30% skiptast jafnt. Engri einstakri útgerð skal þó úthlutað meiru en sem nemur 25 þorskígildistonnnum.
4. Hver útgerð sem úthlutað verður byggðakvóta skal landa a.m.k. tvöfalt meiri afla (tonn á móti tonni) en sem nemur byggðakvótanum til vinnslu á Þórshöfn. Í umsókn skal gera nánari grein fyrir þessum þætti (t.d. aðgerðarþjónusta, eigin vinnsla o.fl.).
5. Ný útgerð telst sú útgerð sem hafin hefur verið innan síðustu þriggja ára, hefur fjárfest í aflahlutdeildum og stefna viðkomandi útgerðaraðila er að hafa aðalatvinnu sína af rekstri viðkomandi útgerðar. Leggja skal fram gögn til staðfestingar framangreindu s.s. kvittanir vegna kaupa aflahlutdeildar og áætlanir um rekstur.
6. Sækja skal sérstaklega um vegna nýrrar útgerðar, samkvæmt ofangreindum lið. Þær útgerðir sem fá úthlutun samkvæmt lið 5 eiga jafnan rétt og aðrar til úthlutunar samkvæmt lið 3.
7. Fyrir 1. júní 2006 skulu útgerðir þeirra báta sem fengið hafa byggðakvóta gera sveitarstjórn skriflega grein fyrir því hvernig þeir muni nýta úthlutaðar aflaheimildir fyrir lok fiskveiðiárs. Geti hlutaðeigandi ekki fylgt reglum sveitarstjórnar skal hann afsala sér byggðakvótanum, sem síðan verður endurúthlutað.

Sveitarstjórn afgreiðir umsóknir í samræmi við reglur þessar og úrskurðar jafnframt í vafamálum sem upp kunna að koma við túlkun þeirra.

2. gr.

Auglýsing þessi er gefin út með stoð í 4. mgr. 4. gr. reglugerðar nr. 960, 6. desember 2004, um úthlutun á þorskígildislestum til stuðnings byggðarlögum, til þess að öðlast þegar gildi.

Sjávarútvegsráðuneytinu, 6. desember 2005.

F. h. r.

Jón B. Jónasson.

Guðný Steina Pétursdóttir.